

Obraćanje visokog predstavnika Valentina Inzka na otvaranju panel diskusije "EU i njeni susjedi"

Forum Alpbach, 23. marta 2012. godine

NATO-EU dinamika podržava napredak BiH

Gospodine predsjedavajući, kolege panelisti, dame i gospodo, Uspješna integracija Bosne i Hercegovine u evroatlantske strukture je nezaobilazan element dugoročne razvojne strategije Evropske unije – što je opća tema ovog foruma – i nezaobilazan element odnosa Evropske unije sa njenim susjedima – što je konkretna tema naše jutrošnje panel diskusije.

Integracija BiH je nezaobilazna u sveukupnoj strategiji EU iz tri razloga.

Prvi razlog je da integracija Zapadnog Balkana – što će donijeti značajne ekonomske, socijalne i sigurnosne koristi građanima EU kao i građanima Zapadnog Balkana – ne može biti završena ako jedna ili više država u tom regionu ne budu obuhvaćene integracijom.

Drugi razlog je što Bosna i Hercegovina ima kapacitet da ponudi jedinstven i prepoznatljiv doprinos kontinentu kao cjelini. Trauma njene nedavne prošlosti je, historijski gledano, anomalija. Ova zemlja ima dublju i inspirativniju tradiciju skladnog zajedničkog života iz čega Evropa može izvući korisnu lekciju.

I treći razlog je što je u ovom periodu, kada se EU bori sa ekonomskim izazovima, neophodno da ona održi čvrst i

pragmatičan pristup ka rješavanju problema u Bosni i Hercegovini tako da se ne suoči sa novom i potpuno bespotrebnom krizom na svojim granicama.

* * *

Dobra vijest je da je, nakon godina političkog zastoja, 2012. godina imala dobar početak u Bosni i Hercegovini. Dana 10. februara, više od 16 mjeseci nakon izbora, državna vlada je konačno imenovana, a nova administracija se obavezala staviti integraciju u evroatlantske strukture u sam vrh svog programa rada.

Zatim je 9. marta postignut politički sporazum o raspodjeli vojne i državne imovine, što otvara put za NATO MAP i što također predstavlja korak naprijed u rješavanju pet ciljeva i dva uslova koje je Vijeće za provedbu mira postavilo za zatvaranje OHR-a.

Prvi put nakon dugo vremena vidimo politički proces koji je zasnovan na dijalogu i spremnosti na kompromis. To je otvorilo mogućnost da političari budu u stanju pronaći izlaz iz političkog i administrativnog zastoja koji je tako dugo blokirao napredak.

Iz međunarodne perspektive, uvjeren sam da, kako budemo dalje napredovali, moramo zadržati pažljivo prilagođen pristup. Između ostalog, to znači da moramo zadržati potrebne kapacitete da provedemo i okončamo ono što smo definirali da uradimo. Činjenica je da je u Bosni i Hercegovini postignut značajan napredak, a taj napredak je rezultat specifičnog angažmana međunarodne zajednice.

Ohrabruje me proaktiv i konstruktivan pristup koji su usvojili NATO i Evropska unija i uvjeren sam da je nedavno postignuti napredak direktn rezultat pozitivne dinamike između NATO-a i Evropske unije.

NATO i EU su bili i nastaviti će da budu temelji stabilnosti i

potpunog poslijeratnog oporavka Bosne i Hercegovine. Direktan angažman i jedne i druge institucije otklanja sve sumnje i pruža ohrabrenje građanima Bosne i Hercegovine, dok istovremeno daje praktičnu podršku političkom rukovodstvu BiH.

Još jedan element koji je preostao u poslijeratnoj obnovi Bosne i Hercegovine je jačanje samoodrživog političkog sistema koji je konstruktivan, sveobuhvatan i okrenut ka budućnosti.

U tom smislu, uvjeren sam da je proces integracije u EU od posebnog značaja zbog toga što su vrijednosti civilnog društva, ekonomskih sloboda, političkih sloboda i vladavina prava, koje predstavljaju temelje ovog procesa, upravo iste one vrijednosti koje moraju zaživjeti u Bosni i Hercegovini ukoliko ova zemlja želi da okonča svoj poslijeratni oporavak.

Noviji razvoj situacije nudi nadu u postojanje istinskog napretka. Nadamo se da ćemo vidjeti više takvih konkretnih rezultata, te sam, iz trenutne perspektive, uvjeren da imamo osnove da budemo optimisti.

Hvala.